

10
03.0-5
234

大成會叢錄

1936

丙子「夏季」

第五十四期

徐子休先生逝
世志歸

徐子休先生遺像

曾鑑
拜題



大成會叢錄第五十四期 徐子休先生逝世專號目錄

事略

病中遺著

治喪紀略

唁電

唁函

哀辭

輓詩

輓詞

輓聯

出殯記

大成會叢錄 目錄

日新印刷工業社印



623718

入祠記

載院長電告旅京同學設奠概況

圖書館籌備經過

大成學校紀念徐先生之辦法

霽園先生事略

先生諱炯字子休姓徐氏名其所居曰霽園故學者稱霽園先生晚年取
玩心神明蛻污濁兮之義自號翁蛻死世明中山王之胄也中山有子二皆爵
上公居北平者爲定國裔居南都者爲魏國裔清康熙初魏國裔有自句容以
賈入蜀者行旅往來遂兩家焉五傳而至 根先公值太平軍起阻兵不得歸
及兵事敉平故鄉殘破始占籍華陽是爲 先生之考 根先公娶 王太宜
人有子四而 先生次第三生而穎異資性絕人束髮受書應口成誦 根先
公手校四書反身錄儒門語要授之遂慨然有希聖之志年十九補學官弟子
翌年即開館授徒旋食廩餼調任尊經書院所與游如曾竺齋曾奐如岳鳳吾
劉輯五胡硯蓀楊叔嶠吳伯錫周芷庭尹仲錫劉豫波胡雨嵐陸繹之文海雲
諸君子盡一時端士以學行氣節相摩礪光緒癸巳恩科領鄉薦兩赴禮部試



不第 先生之初上公車也因同邑喬左丞樹枏榮縣趙侍御熙識富順劉斐村光第時劉公官刑部介直有時譽聞 先生議論恨相見之晚由是往還日密戊戌變法劉公得新參未幾慈禧復訓政 先生引朱子一日不得其官則不敢一日立乎其位之語急以書勸劉公引退書未達而禍作 先生歎曰人之云亡邦國殄瘁遂絕意仕進家居授徒爲事 先生初以制藝名一時自是屏棄教門人研經史致用之學而以宋明義理之書淑其身心非禮不履躬自率先故師道尊嚴人擬之程正公云又力主游學海外求新知以應世變會奎樂峯督蜀議遣官籍子弟留學日本黔陽李公仁宇任監督謂宜增川籍士子入之時 先生主廣漢瀚江書院因遣人就商 先生請擇壽園弟子與其選 先生即以周奉池徐深甫兩君薦是爲川人出國學陸軍之始旣而拳匪亂作兩宮蒙塵 先生慨清政不綱外患日迫尤垂意少年卓犖之士以爲救亡

之備乃立澤木精舍於江南館蓋取易大過卦象也是時先生議論激昂學者多爲竦動戴季陶熊錦帆但怒剛劉亞修諸君子出其中西林岑公督蜀耳先生名造門請謁邀主編譯局遂輯開邪錄等書著歷代邪教之禍爲世殷鑒近年印行之息邪篇即損益是書爲之也與學議起邑宰桐城方公鶴齋延先生與胡公兩嵐陸公繹之改潛溪書院爲華陽學堂爲諸邑倡其多遣子姪赴日留學身送之至東京藉以考察彼邦教育及歸江寧吳蔚若提學入蜀以鄉誼謁先生於祠山殿議開辦東文學堂聘先生任監督試取全川秀士入堂肄業適卞建川漢鐵路隨糧徵集路股川中風氣閉塞人多疑之先生就堂中爲諸生詳說交通之利俾歸諭其鄉里故不勞而事集復謀於當道以路款送學生赴比利時學路礦如朱君籽潮馮君一披其選也是爲川人至西洋學礦業之始諸賢周君孝懷少從其尊人客蜀受業於先生執友趙堯生

周紫庭以師禮事。先生及官四川勸業道推。先生任省農會會長。先生以改善農事當具新知商周君派遣學生東渡習農藝如鄧君心微李君漢秋其選也是爲川人出國學農業之始。先生憂時救亡之念早造成輿論之力。疆不數年間蜀士渡海求學者以百數。先生實啓之而輓近年少或以腐儒視。先生非惟不足知。先生亦數典而忘祖矣。先生自東游歸國頗右科學於政治之主張雖間與黨人闇契而實不隸黨籍守舊者疾其所爲構之當道。先生不自安飄然走陝西時尹公仲錫官西安太守。先生留寓署中而中傷之者極之於其所往布政使樊公雲門得密告盛服投刺來謁。先生以旅中未具公服例當辭避語未畢而樊已入且行且語曰吾輩讀書人何拘備節及相語乃大歎服出語人曰徐公儒而俠者也命其孫受學焉每與言輒聽從。先生以關中爲西北要區俗淳民樸大可有爲之地而當時風氣鄙儻尤

甚於蜀乃勸樊考派學生出洋游學樊是其議以告曹中丞仲銘奏試秦中英
俊官送赴日本聘 先生任監督陝西之有留學生自此始去年來蜀之張季
鸞君其一人也故張君所作入蜀記於 先生三致意焉 先生自東京旋秦
適秦中將創建鐵道留 先生任總辦已定議矣會川督錫清弼開辦通省師
範學堂促 先生歸就監督 先生以桑梓之義去秦回川主師範學堂四年
積束脩四五千金悉辭弗受而訓育學者則不懈益勤今散布全川教育界之
優秀大氏當時所陶鑄也叛附屬小學於英俊好學之青年引與共起居一言
一行示以身教今皆能自樹立又病學者襲人皮毛蔑我國粹組國學研究會
釀金購書月終集會繳札記各抒所得以相討論其他所嘗教授若四川高等
學堂存古學堂官班紳班兩法政分設中學第一小學第二小學華陽中學華
陽小學省立第一師範第一中學資屬中學德文學堂北京國民大學等教澤

偏寰區學徒逾數萬卓然爲一世大師宣統初元革命風潮漸熾有謀在川舉事者事洩楊君莘野被逮繫獄謝慧生鄒漢卿徐可庭諸君皆不安鄉里鄒徐方學於通省師範先生使走陝西依尹公仲錫以避禍徐君今官財政部次長而鄒君則於民國四年與張列五都督同被難北京宣武門外先生深悼惜之宣統三年學部開中央教育會議先生與陸繹之吳權奇杜紹裳諸公同赴會力爭讀經案語載北京芻言報及壽園隨筆反川後植鐵路國有議起蜀人爭之力罷市巷哭總督趙爾豐逮首事者拘署中四野豪俠以保路爲名集隊抗官軍事寢擴大清廷派岑春煊入蜀查辦紳商以岑夙重先生推先生與邵明叔君赴渝待岑面陳民意及抵重慶朝命改派端午橋來蜀與先生相見議未愜而武昌變作先生適反成都四川旋獨立十月十八變後尹碩權出任都督羅子青副之尹故先生門人羅亦友也事必就諮焉時訛

言滿漢將互攻於是漢兵圍少城滿兵亦登陴列礮距守事機危迫間不容髮尹羅乃請先生與周紳紫庭入少城調解先生爲駐防將軍協領等詳析利害勸繳械以釋嫌疑且請以身留質又召八旗耆老子弟諭以禍福先生門下故多旗籍諸生而將軍協領亦素信先生於是械繳而滿漢遂安此辛亥十一月四日事也岳公鳳吾自海上聞之遣先生書曰足下以子輿氏之好辯具大雄氏之慈悲成都旗防白骨生肉蓋實錄也民國建元再赴中央教育會議於尊孔讀經案抗爭愈力而議場中以衆寡不侔卒歸無效自是痛疾學制之壞回川後有以辦學爲請者概謝絕之次年尹碩權以川邊經略使駐節鑪城迎先生西游先生初無意往繼思可因尹以建言乃至鑪用尹名義電請復讀經尊孔其秋先生再入京孔教會會長高要陳重遠博士知此電出先生躬謁先生於旅寓並請蒞會講演（講演詞共二篇載霽園文鈔）國

民大學聘 先生任教授留京兩年嘗以其間赴山東登泰山謁 孔林乙卯
旋蜀未幾袁氏稱帝邵陽蔡公首義昆明吾蜀劉積之軍長先響應紳民上書
請獨立者踵相接將軍陳二庵氏爲袁腹心布告禁上書辭甚嚴厲莫之敢嬰
先生最後致書陳氏（書載霽園文鈔）痛陳順逆利害書付郵然後告家人
陳氏卒感悟宣布獨立延 先生入署計事人皆爲 先生危而 先生毅然
竟往勸陳氏通電明態度帥北軍出川並保川軍無難之者陳氏俱承諾成都
幸不糜爛 先生慨世變日亟士風日敝思表章先哲以風後進集同志募捐
建六先生祠祀宋代二范張魏譙李諸鄉賢皮書兩楹選各校俊秀組閱書會
休沐親爲講說反覆於義利公私之辨每季則以文課驗其所得繼復創大成
會請於劉禹九總司令撥地爲會址旋議開辦學校衆推 先生任校長時 先
生年逾六十矣住宿校中與學生同起居言教動法無敢不率揭尊孔讀經爲

宗旨高尚謹嚴弘毅三端爲校訓每朝必有訓話每週必有講授自爲講義
哀次成集又發刊叢錄手自編訂十餘年無間斷方民國十六七年間毀孔之
風甚囂塵上打倒舊禮教之標語偏榜衢路集隊游行有過孔聖堂而指詈
之者先生屹然不爲動謂諸生日風雨如晦鷄鳴不已仍講誦習禮樂絃歌
之音不絕識者佩先生苦心孤詣贊助者益衆灌縣姚寶珊君捐建禮殿成
都劉萬鍾君捐修教室李其相張先識諸君捐贈圖書其他輸金者尤多非
先生大成學校必不能繼續保持至今日無疑也辛未之歲門人以先生七
旬大慶又適服務教育五十週年乃籌辦紀念集資爲先生壽會曲阜孔
廟毀於兵先生即匯千金助培修又排印呂晚村集重刊張楊園集罄其金
而後已未嘗一毫自私其平生狷介多此類自是以精力衰罷以校務付門人
而祭祀會議仍必親臨省文廟春秋釋奠及孔誕紀念亦必與祭或發講說

其餘賓客酬應一切屏絕惟讀書著述不廢自言識字以來未嘗一日去書垂老猶鷄鳴而起讀經寫經作文閱報以爲常家人以節勞爲請先生曰我自樂此不爲疲也癸酉春川北赤匪初起先生組嘉言社先後發防共宣言十篇（見霽園文鈔）於治本治標之法包舉無遺意促軍民之警悟當時莫之省也卒之今日剿匪奏效其所設施率不能外先生之言方匪之突破嘉陵江也成都危在旦夕各方紛電中央請派兵入川督剿或舉滇黔軍往事以主客之形爲疑先生作異哉所謂川人治川一文闢之文出京津滬渝各報爭先傳載一日徧全國遠近應和蓋衆人之所欲言而不敢言者先生獨先得人心之所同然不避嫌怨慷慨言之故天下莫不高先生之義時賢如戴季陶張季鸞曹纓蘅謝无量或歸自省外或初游來蜀皆舍館未定先謁霽園以爲川中正氣之所寄惟在先生非徒門人故舊之私誼也蔣委員長旌節蒞蓉

數延至行營與商大計 先生盡志披陳深荷同情全國禁煙委員會成立聘任委員及臨會期電促赴京 先生已在病中乃因周奉池君赴會之便屬其代陳意見豈圖會未畢而 先生逝矣時民國二十五年二月三日也年七十有五赴至京 委員長及同會諸委員無不愴悼來電弔唁 先生自庚午之秋即邁膀胱病厥後每歲必發愈發愈劇先是宣統中湘潭趙公芷蓀典蜀學與先生議最契趙嘗官御史直聲震天下 先生亦夙所服仰故相爲引重及趙公告官旋籍與 先生書翰往還二十餘年無間去年冬 先生病中得趙赴歎曰同聲相應同氣相求予殆將死矣力疾爲文祭之病益革然神志清明始終不亂遺命薄葬速葬治喪不用樂不作佛事時已不能閱報有省疾者猶諄諄問華北近况口誦放翁王師北定中原日家祭無忘告乃翁之句憂國之誠死而不已 先生兄弟皆早世配 許宜人華陽許公紱生之女 先生性剛急

老

宜人常相之以柔和戚郇稱賢助焉先 先生十七年以民國七年卒或以
先生多疾勸置侍媵 先生峻拒曰先而娶妾不惟敗德且遺害子孫自是無
敢復言者子一人誕日本東京帝國大學農科畢業歷任四川農學院教授建
設廳科長華陽職業學校校長現任省立女子高級職業學校農科主任事
先生以孝聞女一適同縣謝剛塞日本明治大學畢業現任青島市立醫院主
任孫男四長曰孝開自大成中學畢業後 先生使專究中國文學躬督課之
以故爲學知旨要能世其家次孝闔孝閭俱肄業大成初中次孝閔尙幼女孫
三人長禮卿適營山蔡家鯉現肄業上海交通大學次廉卿介卿俱就學曾孫
女一人貞娟未周歲 先生色莊言厲日閃閃如巖下電方正疾惡面責不能
容人之過然外剛內和事去輒釋無藏怒宿怨廓然而大公物來而順應故人
憚其嚴亦樂其易雖見譴訶退無後言數十年中主持清議凡事關風化及民

生疾苦明知乖時忤俗而仗義直言不少避忌有尼之者 先生曰大丈夫處事論是非不論利害也性樂山水自少即有鄉居之志中年牽於人事既而四郊多壘迄未能遂每佳日偕三五門人徒步荒野流連泉石去秋病中猶與康兆民處長攜藥餌作新都之游癸酉秋應航空主任王君東邀乘飛機繞成都數匝聞者壯之 先生至以爲樂詩紀其事其天機活潑蓋如此於學無所不窺訓詁考據辭章制藝皆始入而中弃之於義理初兼紫陽姚江刊明儒學案傳習錄四書反身錄排印小心齋箴記龍溪語錄等書其後反覆桐鄉平湖晚村之說病王氏之恣肆與其末流之弊乃篤守洛閩復梓近思錄伊洛淵源錄楊園集論孟或問排印思辨錄晚村集嘗思翻刻大中或問朱子語類三魚堂集而力未能逮其教學者從張陸薛胡以溯程朱更上而尋源孔孟則用力少而收功多節省精神以究時務常曰知古不知今謂之陸沈其志事可推見矣

所著有霽園文鈔七卷詩鈔三卷隨筆若干卷大成講義四卷修身講義四卷
守約篇二卷羣經大綱論語要義人倫道德講義逸民傳英雄大事記弘濟錄
軍人道德談知今錄國文教授文學初基蒙學初基四書問答歷史問答蜀事
問答中史略說中外一百名人歌各一卷又選輯史傳三編初續六卷中學國
文課本三卷小學國文課本二卷息邪篇二卷章茲錄備忘錄大成學校校訓
各一卷其餘未印行者尙待清理門人將彙次爲霽園叢書初六先生祠旣建
十有五年 先生以鄉賢劉公裴村立身治學能恪守宋儒槩燹堅苦卓絕大
節凜然爰附祀祠右以風末俗 先生之歿故舊門人以 先生學行不讓劉公
決議配祀其左並私諡爲剛介先生德龍從 先生晚學無所似誠不足傳 先
生於萬一謹求之 先生家人訪之同門先輩證之霽園隨筆參以平日所聞
做李氏先正事略之例彙而輯之世有知先生者彌其闕遺以俟載筆之士采

諸國史傳之無窮在 先生固不以是爲增損然其裨益人心世道不已多乎
門人李德龍謹述

大正會誌

金

病中遺著

先生自去歲（乙亥）夏歷八月九日祕症復發時愈時劇病中讀書著述一如平昔迄於易簣之前數日猶口誦隨筆數條命家人錄之茲檢先生遺稿得詩一首書一篇歌一章輓聯三副祭文一篇隨筆五則並彙爲病中遺著其餘已載本錄五十三期茲不復出編者謹識

題問禮亭一首

八月二十六日

沈霾千餘載陰有神護持一旦出泥滓寒芒走蛟螭車馬溷風塵問禮圖先師上起永明年下訖共和時此中如有意戴君偶得之載歸覆以亭莊嚴而陸離我國重禮教築此太平基吳蜀風雲接悠悠繫我思

與戴季陶書

九月十七日

季陶仁弟勛鑒考李頤陝西蓋屋大學者稱二曲先生呂留良浙江石門人學

者稱晚村先生二曲學宗陸王而標慎獨之旨晚村學宗程朱而兼永嘉之粹
二儒生當鼎革之際皆堅苦卓絕百折不回其人格之尊德性之純實有邁古
軼今者當時遺民孫夏峯張楊園陸桴亭先從祀孔庭清季顧亭林黃梨洲王
船山亦從祀孔庭民國以來顏習齋李恕谷亦從祀孔庭獨兩先生德與之齊
運逢其蹇雍正帝既虐晚村於前道光帝復斥二曲於後是非顛倒寧得謂平
二曲云表章先哲所以風厲後進方今人心日漓風俗益澆若崇祀兩先生以
樹之風聲知所以廉頑立懦者必能使邦基強固外患潛消蓋人心正則風俗
淳風俗淳則人材出詩有曰濟濟多士文王以寧此陶鑄人羣之真機括亦轉
移世運之良好機會也况二百年前二曲已有取於泰西水利晚村已研究西
人天文此其學識宏通早統中西而一貫求之先儒豈可多得某已約同人呈
請國府謂兩先生生理宜從祀呈到之日祈老弟裨助贊成之此舉所關匪細事

在一時功在千秋也諸希電照不宣徐某拜啓

華陽中學校校歌 十月十四日

繫造化之鍾靈兮華山之陽近帶夫岷峨之雄秀兮遠距夫黑水之泱泱先二
范之道德兮後乃及禹玉之文章宏材俊偉奇節卓犖惟我學生之是望深造
而自得兮乃多難之興邦勉旃勉旃一校也而可以觀國之光

祭湘潭趙芷蓀先生文 十二月十二日

公之一疏關係存亡大姦不去社稷遂荒公之再起實典蜀學羣倫矜式泰山
喬嶽時不可爲翩然遂歸金萱在堂孝養依依天動地岌忽丁國變弢光嶽麓
龍潛不見二十餘年承公眷注賜書盈篋匡以道術山川修阻不獲登堂臨風
遙祝老人壽昌何期一旦兩泣風淒天不憖遺余將疇依有淚如鉛灑彼湘水
一代完人今則已矣國殞貞臣人乏導師真儒即世正氣全漸天長地久如何

勿悲公有神靈尙其鑒之

輓向南皋聯

九月九日

正氣消德星沈人間何世
玉壘崩喬木壞吾道益孤

輓劉厚生聯

十一月二十三日

亦雙流亦華陽鄉關黯淡鄉賢殞
是循吏是孝子北風凜烈北堂悲

輓田澄伯聯

十一月二十七日

不夷不惠論遺徽是天半朱霞雲中白鶴
而今而後流哀響於兩行秦樹萬點蜀山

隨筆五則

大成會集

治喪紀略

徐子休先生於中華民國二十五年夏歷正月十一日丑時逝世先是初八日疾革醫者屬備後事家屬招霽園弟子分任籌辦至屬纊之前附身附棺一切具備遵薄葬速葬遺命於即日午前十一時小殮午後五時大殮親友門人聞耗奔哭者以百數次日霽園同學即成立治喪處於先生寓所襄助家屬經理喪事是日成渝京滬各報同時揭載先生逝世消息街談巷議嘆息咨嗟無不曰徐先生死矣知舊門人唁電交至十七日成服弔者五百餘人收到輓聯五百餘件二十八日展奠弔者千人並前所收之輓聯共千餘件又各方唁電唁函各數十件是夜行文公家禮司儀盡前後及門也翌晨扶柩至東關外曹家冲先塋安厝詳具出殯記中

大正會館

唁電

南京蔣委員長電 四川省政府轉徐子休先生家屬禮鑒驚聞子休先生溘逝老成凋謝愴悼曷勝特電致唁蔣中正禁秘鴻歌

南京戴院長電 成都苦竹林徐孝恢兄禮鑒閱報驚悉夫子夫人遽歸道山天不憖遺愴懷曷極望以繼述爲重節哀順變用襄大事弟情切心喪末由奔赴臨風西望但有悲哽弟傳賢叩虞

南京徐次長電 蓉中央銀行轉徐孝恢兄禮次驚聞休師仙逝慟悼曷勝吾兄孝思純篤自必哀毀逾量惟念休師道德文章與世並重更享高年毫無遺憾尙冀節哀順變肇啓先猷弟遠在都門莫及趨弔瞻望錦天不盡於邑茲託成都中央銀行匯奉奠敬三百帙即祈代備牲醴叱名叩奠爲感弟徐堪叩微
南京吳部長電 建設廳何秘書轉徐孝恢先生禮鑒驚聞令尊逝世曷勝慟

悼尙望節哀順變勉襄大事特電弔唁吳鼎昌虞

南京張部長電 成都苦竹林街徐孝恢兄禮鑒子休先生德型人望驚悉遽

返道山愴痛至深敬電布唁諸希順變節哀爲荷張羣叩青

貴筑曹廳長電 成都苦竹林徐孝恢兄禮次頃驚悉子休先生遽歸道山永

訣音塵曷勝愴痛俯念休老鐵肩衛道苦心誨人澤被鄉邦已無遺憾尙冀賢

兄慎持大事益紹門風特電奉唁并紼縵哀弟曹經沅叩支

星子康處長電 徐子休先生家屬禮鑒閱報驚悉子休先生於三日仙逝憶

澤在蓉時猶親承訓誨不意一別竟成永訣老成殂謝慟悼曷勝謹此弔唁康

澤叩陽星班印

南京禁煙委員會總會電 省政府轉徐子休先生家屬禮鑒聞徐先生溘逝

老成凋謝哀動蓉城噩耗遙傳同深愴悼禁煙委員會總會全體同唁歌

南京謝委員无量電 苦竹街徐世兄禮鑒閱報驚悉尊公子休先生遽歸道
山蜀中侍教會幾何時嶽壞棟摧可勝慟悼謹此馳唁謝无量叩微

曲阜孔奉祀官電 四川大成會公鑒頃閱報章驚謫子休老先生遽歸道山
老成凋謝薄海同悲眷念斯文彌深軫悼肅電奉唁但傷曷極闕里孔德成叩
真

上海陳星伯先生電 苦竹林街徐孝恢先生禮鑒閱報驚悉霽園師遽逝痛
悼靡已特電奉唁并請節哀受業陳配德叩支

上海蔡過庭先生電 成都苦竹徐孝恢頃奉訃告驚悉徐太親翁遽歸道山
曷勝哀慟噩耗傳來瞻依頓失伏祈節哀順變以慰先靈婿鯉

南京大成學生藍澤惠等電 苦竹林街霽園徐孝恢先生閱報驚悉蛻翁仙
逝震悼曷極尙祈節哀珍攝特先電唁中央軍校大成學生藍澤惠等魚

南京胡昌熾陳嶸先生電 成都苦竹林街徐孝恢兄禮鑒尊公一代儒宗鄉邦砥柱頃聞謝世黎庶失怙謹此電唁胡昌熾陳嶸

南京胡政之先生電 苦竹林街徐孝恢兄禮鑒休老仙逝鄉國同悲望節哀思爲學珍重謹電奉唁弟胡霖

河南張季鸞先生電 苦竹林徐孝恢先生禮鑒旅行中聞先師之訃違侍經年竟成永訣哀感曷似葬儀不克執紼謹電奉唁默禱師靈永安呵護家國祈兄節哀述志弟張熾章叩芻

重慶涂重光先生電 成都苦竹林街徐孝恢兄禮次休老仙逝導師遽失瞻念典型不勝悲惋謹電奉唁並候孝履弟涂重光


西康沈樂峯先生電 省府秘書處趙主任秘書香畹兄快密煩譯轉孝恢兄披閱報載休師仙逝驚聞噩耗痛悼何如哲人雖萎正氣長存弟身在邊疆末

由叩奠郵奉薄儀聊表微忱敬乞查納弟沈樂峯叩感

榮縣張縣長電 苦竹林街徐孝恢世仁兄禮鑒昨閱報載驚悉休老世伯道
山遽返悼痛實深純孝如兄自必哀毀逾恆惟念老伯古稀上壽福德全歸得
吾兄孝養生前死盡大禮在天之靈定當含笑務乞節哀以慰九泉弟寄跡榮
州關河間阻未克趨弔至深歎仄謹具挽聯一付即希代奠靈几用表哀忱專
唁孝履張鏡蓉叩養印

重慶鄧子文諸先生電 成都苦竹林徐先生家屬禮鑒頃驚聞休老噩耗令
人痛悼靡已老成凋謝遐邇興悲特電奉唁鄧子文趙城璧溫嗣康李奎安叩
佳印

重慶市商會電 成都苦竹林徐先生家屬禮鑒驚悉休老仙逝痛悼實深特
電奉唁重慶市商會佳印



唁函

彭縣王意先先生函 孝恢世兄禮次頃奉報單驚悉吾師已於二月三日溘逝涕零南望愴痛曷勝俯念吾師設教蓉城五十餘年平日正誼是持誨人不倦上探洙泗下續朱王念道德之淪亡作中流之砥柱教澤所敷聞其風者無不廉頑立懦今日全歸已無遺憾尙望慎持大事勿過哀毀以續吾師未竟之志是所至禱特電奉唁并請節哀弟王亮叩庚

重慶洪範民先生函 孝恢學兄苦次前奉飛報驚函先生駕歸道山從此瞻依失所展敬無由茲虔具卷幣五元聊當芻獻不恭之至敬祈原宥先生神雖歸嶽而遺道自在人間吾兄以繼志爲孝尙希節哀順變毀不逾制是爲至禱肅此敬致唁誠順候禮安弟洪楷再拜 二月十八日

胡光權先生函 孝恢兄禮次權自省外歸來抱病迄今昨閱報載子休

先生遽歸道山一代宗師爲世惋惜茲以病軀弗克趨弔送上挽聯請懸靈次聊表微忱并望賢兄順變節哀摒當大事以慰先靈草此匆匆謹唁孝履弟胡光權再拜

漢口楊思濂先生函 孝恢世兄苦次頃閱邸報驚訖鞠凶在先師碩德耆年生寄死歸夫復何憾伏望世兄順變從禮以全純孝勿徇一時之哀以致無益之毀也弟職責所羈莫由晉奠長號永望此懷難論謹奉手疏上慰不次敬問孝履伏惟督照弟楊思濂拜啓 二月十四日

北平章雪樓先生函 孝恢兄禮次頃奉老師大人仙逝訃音噩耗傳來驚悼曷勝想吾兄驟遭大故痛毀必深敢乞節哀順變以襄大事弟遠處舊都躬奠殊難今由郵另寄挽聯一付挽幛一端聊表哀忱藉代芻獻伏惟珍重肅候孝履弟章毓藻謹上 二月二十三日

羅江丁識一先生函 孝恢世兄禮次驚悉休師遽歸道山至深痛悼非孝非孔來日大難尙乞克承先志無過毀傷弟廬守母墓趨弔末由謹具挽聯即希代薦靈右聊當芻獻并唁孝履制弟丁識一拜啓

上海陳堯甫先生函 孝恢仁兄世大人禮次昨閱報載吾師棄養之耗山頽木壞震悼至深弟以飢驅四方碌碌無所成就每念追隨杖履裁成屬望之殷五夜徬徨不知置身何所溯自民國三年侍座京師情景尙如昨日豈知飄泊羈旅還鄉未卜而春風時雨遂永無再被之時邪年來多歷艱難少知爲學之要方期有所請益庶補蹉跎今則更無望矣詹望師門真不知涕泗之何從也吾兄習聞詩禮至性過人大故猝膺知必異常悲痛惟祈節哀以禮勉宏繼述用塞四方之望亦即以上慰吾師在天之靈是所至禱附呈挽聯一副祭幛一端敬乞代懸肅肅寸函奉唁孝履弟陳毅敬啟 二月十九日

孫軍長函 孝恢仁兄苦次昨接省訊驚悉尊翁休老先生逝世正策征驟盼耆賢之教誨悲傳馭鶴傷碩德之凋零歸轍難攀徒望名山而景仰臨風憑弔遙懷錦里以悽愴茲因職務遠羈莫由躬奠謹派晉處長鴻圖躬詣靈前代爲致祭附奉賻儀二百元藉伸微悃即請警存并乞爲時珍重節哀順禮以慰先靈是所至禱肅函佈臆敬唁孝思諸惟禮察弟孫震再拜 二月十九日

南京張寔甫先生函 徐孝恢兄苦次驚聞師歸道山爲天下痛兼哭其私尙

冀節哀盡禮勿過毀傷臨電涕夷敬唁孝履弟張鏡明叩微印

眉山梁專員函 孝恢仁兄金玉廬次得訃告正麟在出巡道中奉唁稽遲歉甚罪甚足下孝誠深至斬焉在疚悲痛可知然以先德克享大年及門羣彥比美河汾沒世之名自有不朽全歸無忝即此亦足以殺足下金玉之悲尙望節哀無爲毀滅以慰在天之靈謹擬聯語乞爲書懸誌悼臨書不勝拳拳恭候禮

履不一愚弟梁正麟再拜 二月二十四日

李總司令函 孝恢仁兄禮鑒頃接省電驚悉太翁子休先生逝世老成凋謝愴痛曷勝尙望順變節哀勉襄大事特遣舍弟注東參謀長陳啟鸞兄代表奠祭并具賻儀二百元希賜鑒存謹電奉唁不禁神馳李家鈺魚戍

崇寧鄧軍長函 孝恢仁兄禮鑒頃閱報載驚悉休老遽歸道山國難方殷哲人先萎遙傳噩耗愴悼曷勝吾兄純孝性成自必悲痛逾恆惟念尊甫道德文章名垂宇宙音容雖杳遺教長存孝以承志爲先禮以守身爲大尙乞節哀順變無作過情之毀弟督勦逋寇趨弔莫由謹具挽聯聊當芻獻即希代懸靈右用表寸衷專函奉唁即頌禮安弟鄧錫侯拜啟 二月五日

瀘縣曾晴洲先生函 孝恢吾兄惠鑒閱報驚悉夫子大人遽歸道山士林失仰哀悼同深伏念我夫子憫世道之衰微懼人心之陷溺正言讜論震懾一時

浩劫狂瀾賴以挽救其與平日之道德文章均足以並垂不朽方之古賢可謂無少愧色即可無少遺憾惟是吾兄純孝哀毀可知尙祈順變節哀善自珍攝恢宏先緒大孝在茲引領西雲倍增悼念特函致唁不盡區區恭候禮安不備弟曾朝選頓首 三月十一日

祭文

中華民國二十五年二月二十二日修武門生康孟耕謹修鷄黍之奠致告於先師霽園徐夫子之靈曰嗚呼羣陰閉塞大道晦冥是非淆亂邪正幽盲鬼方交作狼虎縱橫乾坤流血草木灑腥嗚呼夫子爲時日星痛世陸沈竭力措撐提倡尊孔主張讀經建學著書覺世正型苦口危言疾呼大聲期望神州復底治平胡天不弔木摧山傾風悲雨泣鬼哭神驚耕也不才訓誨遠承手教疊賜諄復叮嚀解析羣惑指示途程叢錄諸書歲積篋盈去冬疾病聞之涕零方冀春和漸愈起行噩耗忽來竟奠兩楹悵失依歸悲不自勝追念教澤曷敢自輕奉讀遺書益用兢兢略抒哀忱遙薦一尊

維中華民國廿五年歲在柔兆困敦陬月下浣二十八日門生游輔國謹以香燭楮帛菓品聯幃不腆之儀恭祭於

徐公霽園夫子大人之靈前曰嗚呼哀哉輔國之從先生三十年於茲明義利別公私守繩尺惡權奇行與俗乖爲世所嗤然終居之不疑信聖賢可以學而爲者蓋嘗聞之於吾師輔國之游於門也先生嘗拔於其儕進而教之曰貧賤憂戚玉汝於成毋患乎貧疾沒世無名毋患乎賤居易以俟變行聖人之行服聖人之服道聖人之辭磨而不磷涅而不緇士有瓦礫汝爲明璣士有砥砢汝爲璋圭輔國退而誌之益以自負服之不敢違嗚呼今先生遽歸道山而輔國四十無聞誦斯言也不自知其涕泗之漣洏哀哉尙饗

唯年月日弟子陶世傑謹以清酌庶羞之儀敬祭於
霽園夫子之靈嗚呼維獸有豸戴角觸邪鳳長羽族不仁則嗟民之秉彝好是懿德世亂學乖變白爲黑清儒說經爰標漢幟務碎逃難其末也復大共尸祝惠戴爲宗源遠流分剽說雷同逮於常州乃更疑聖父仇子劫廣雅慨詠改制

說倡清局以竟羣飛海水人失其性彼奸黠者嘯聚童昏六經罷黜肆厥醜言
峨峨鬢宮弦絕誦止高踞吾牀孔以不祀人自變夷夷更人喜跳踉大呼瞋目
染指東侏南任長蛇封豕赤燦挺怒無所不毀妖由人興人自失常吾師於此
歎咤悲傷其亡其亡口焦豪禿衆楚羣咻睢盱側目 師也人豪子覆我興百
折不撓浩氣彌增人不識經講席自親人不知禮孔殿特起人或非孝空桑用
悼食我桑甚懷我好音知恥而恥孰無人心孝則至矣移孝作忠爛爛史冊更
記英雄凡此提撕亦自有年誰謂儒者不勇而跽閉門造車出門合轍今之政
條曰新生活滌瑕蕩垢礪行砥節先覺在茲目蒿鬢雪翻然改觀禮此老儒鼓
篋而陳早有成書人見之晚師見之早矜哀不能相與大好風教既正德音孔
昭蒲輪空降道山已遙嗟予小子年始舞勺摠衣升堂得瞻喬嶽一言而善獎
飾逾恒澡之雪之歷級而升每值休沐殷殷相召亦步亦趨追隨言笑莽蒼之

野沮洳之隩適意因心卽物寓教最可感者六先生祠百城假我兩歲於茲我喜詞章偶涉訓詁師見喟然義理爲主我喜詩歌聲出金石曰明七子學之何益行已有恥博學於文平生所契實在顧君 師乃歡然謂顧可學由顧而上考亭斯卓北燕南越蹤跡暫疏馳箴我服膺敢渝人畏 師嚴我戴 師慈非嚴非慈語不及私客歲之秋時或過我擬創書院以維碩果曾幾何日病遂至革我遭家難喪魂亡魄問疾牀下強爲我興不言所苦發問頻仍曰今之人學何所得富貴震驚患難惶惑厥弊奚由本之不植大者遠者先樹藝極七十五年啓足啓手命也得正悲於何有小子慘然昌言謹拜情切瞻依語多醫戒吁其悲哉朝暮頻來彌留罔訣佇立興哀百年大齊人誰不死寢門一哭心喪盡禮追維風節立懦廉頑默誦高年倒海排山師固不朽吾將安仰精白誓心有天在上以此報師師或不弃涕泣陳辭質諸桓次嗚呼哀哉尙饗

維中華民國二十五年歲次丙子古曆正月二十八日門人杜煥章謹以清酌
庶羞之奠昭告於

子休夫子徐公之靈曰嗚呼異說紛紜大道晦茫自秦火灰而聖緒墜自西學
入而經學荒斯時萬竅鳴而共詆倫理海水飛而潰其堤防浩汗澎湃詭怪萬
狀魚龍惶駭羣將息燭火而淹數仞之宮牆共和樹立道德未彰共黨煽禍尤
欲舉五千年之文化政教悉摧滅而付之汪洋夫子以藐焉之躬方思延洙泗
於一線振聳瞶以多方樹正鵠於學海伸正論以堂皇學本濂洛關閩下及平
湖桐鄉創大成中學以尊孔教而獨講五經四子以明倫常懼邪說而闢之如
犀渚之燭怪著叢錄以醒世如清夜之鐘撞論據則以孝治國字字生鐵鑄就
宗旨則通經致用言言吞吐長江登壇演講奇情狀采瀾翻潮湧諸儒避席籍
湜欲僵論丰采真國中第一講語調亦近代無雙辭嚴義正而傾江倒海疾雷

震電而天地低昂每使頑廉懦立而貪狼爲之斂跡用能驚心動魄即長蛇亦
或潛藏翼以儒先諸書反身錄楊園集息邪篇英雄記皆使人斬截爲人實行
自救救國之道故鏗板而錙銖不較開函而作作有芒更刊明儒學案奚止羣
經大綱不尙詞章而求其寔理不矜考據而去其皮倉發經學之秘如接顏曾
思孟探理學之窟儼對朱程周張其規過勸善不稍假借雖諸老視爲畏友其
口講指畫不辭勞瘁即三伏不避炎光熱誠出於天性莊謹端由志強勁直如
寒松老柏嚴厲如烈日秋霜省克不放些子研理必求精詳百家騰躍而粹義
終入環內萬國紛拏而視民重在如傷標治理而精神四照重人道而大力獨
扛望其貌泰山巖巖每憚其威稜而爲之悚怵近其側春風煦煦又樂其和易
而形骸相忘與人如阜物之膏雨持己如鎮國之圭璋養人長人一本仁義理
智中規中矩庶幾恭儉溫良蓋自律以禮以義而平居必敬必莊此不息之大

勇真足以振末世之頹唐者也當日醉心利祿人欲披猖干進則如狐如鼠得意則如虎如狼夫子獨終身不仕濯纓滄浪謂自私自利爲自殺之策而革心革面乃大道之坊教育自任道義擔當手提造化目炯秋陽昂頭天外鳳鳴高岡屢辭當道之餽遺惟瘁心力於膠庠掌教則萬金不受徵至則高鳥已翔視富貴如浮雲等榮位如秕糠其所行配義與道故其氣至大而至剛時發譴論語重心長每能未雨綢繆消禍患於未形當機立斷繫苞桑於不亡在當時或以爲激而過時始知爲續命之湯批麟不惜直聲震動而羣英表率之儀型已著見龍在田天下文明而大道將行之消息已龐十六字傳心懍懍六十年正氣堂堂衛道即所以衛國衛民即所以保邦方冀興民族於中十杜覬覦於扶桑遽夢奠兩楹山頽嶽壞國府省府嗟失麟祥嗚呼哀哉後生孰誨聖教孰昌人心孰正邪說孰創孰訂莊而矜老孰非苟而排王孰示以正路孰濟以川梁

斯世誰福斯民誰康嗚呼哀哉夫子門多將帥亦有班揚達人之後苟龍邁德
蘭桂騰芳必能繼繼繩繩垂聲教於無疆小子椎魯心有餘而才劣德不進而
焉臧憶丁未至於乙亥時聞師訓妙音琅琅知作人則敬畏獲益示爲政則先
勞無忘提撕周至或欲使爲宰而薦之當軸片長不棄或引爲教師而使加丹
黃或談笑以侍坐或招致以傾觴及垂危之際猶賜以備忘錄而來者是望千
秋絕筆一瓣心香嗚呼哀哉今夫子不得見矣邦國殄瘁人扼其吭等於自伐
舉國踉蹌瞻烏何止恐神仙大藥無以起斯世之膏肓爲前途危爲民族痛而
豈獨哭其私以傍徨嗚呼哀哉小子究心藝事欲以爲百鍊之鋼况綜合篆隸
包孕南北古質新理鬱紆盤結謙讓未遑玩物喪志何補桑滄今而後自策蹇
驢未敢倘佯使聞風者興起或一葦之可航悠悠斯世知德鮮矣慨想音容燕
辭何妨清醴用奠神其來嘗嗚呼哀哉尙饗

維中華民國二十五年歲次丙子正月二十七日學生朱文虎曾厚基賀建明
廖履中劉和瑄龔濂等謹致傷辭於

霽園夫子之靈曰嗚呼哀恫中國天獨降喪亂靡有定如蜩如螳維嶽降神柔
此萬邦顛顛邛邛如圭如璋豈弟君子四方爲綱鳳凰鳴矣于彼朝陽梧桐生
矣于彼高岡經天有漢監亦有光不愆不忘率由舊章人之無良巧言如簧終
風且霾俾民卒狂旣破我斧又缺爲旰我人斯亦孔之將於呼小子未知臧
否匪手攜之言示之事匪面命之言提其耳濟濟多士克廣德心以似以續續
古之人左右綏之實維爾公允師有匪君子敬明其德威儀棣棣爲民之則未
堪家多難予又集於蓼憂心悄悄愠於羣小柔亦不茹剛亦不吐不侮矜寡不
畏強禦在彼無惡在此無斃庶幾夙夜以永終譽俾爾昌爾大俾爾耆爾艾萬
有千歲眉壽無有害乃如之人兮誓不古處適子之館兮遠送於野瞻望弗及

涕泗如雨已矣哉天實爲之謂之何哉既載清酤賚我思成亦有和羹既戒且平鼓瑟鼓琴鐘鼓將將神之假思來格來饗伏維尙饗

維中華民國二十五年歲次柔兆困敦陬月壬申受業胡萬錕謹以時果清酌之儀祭於

休師大人之靈前而泣曰嗚呼夫子一世之師弭亂警世道維宣尼排異舐邪學追朱程不釋不老篤守儒真斯文未墜賴有師承所繫則重維此哲人胸懷灑落光風霽月介節堅貞精金良玉詣歸實踐道重躬行言動肅穆左矩右繩識見卓絕通古知今探奧羣經敦尙彝倫博稽前史洞見廢興維持孔教孤詣苦心時遇梟獍懲如戎夷疾惡如仇見義勇爲讜言無畏公而救民富貴不淫嚼哉其清民國戊午袁氏逆天義不帝之風節峻然時維乙亥執政私權長言摘伏功被蜀川胡天弗弔喪此老成振衰起廢依於何人迥狂挽頽終焉難尋

追維教澤淚墮沾襟乙丑之春師門始登誨語諄諄情猶父兄勵我立志教我修身約我以禮博我以文十餘年來陶鑄恩深晚歲愈篤訓誨尤勤每週面命情意殷殷精擇儒語切至叮嚀雖病沈綿誨語不停論孟要義反覆申明望殷囑重棉力何勝當師疾篤我心殷殷天胡不憖遽隕其生撫尸長號慟絕復醒形儀莫睹誨教莫聞而今而後何咨何詢公誼私情能不酸辛謹遵遺命晝夜服膺敬陳薄奠詎敢哀誠師靈不爽魂兮來歆嗚呼哀哉尙鑾

霽園夫子大人靈鑒門生張亮臣謹率子小門生誠儼誠任誠儀等哀祭丙子正月二十七日承奉赴書哀悉吾師於十一日已作古人哭奠畢即作書奉唁生者連日思撰一文以抒哀悃乃不能舉一字師之德行功言實難彷彿形容也二月五日復奉行狀兼告奠祭安厝日時藉知馬鬣已封靈魂長安恨不能築室種樹著翅飛稟乃敬撰成文恭書二通一於塾中奠祭一寄姪兒於家祭

時代焚靈石嗚呼每丁叔季賢聖挺生清之未造乃有哲人立黃反覆獨萃羣
英往繼濂洛達權守經畢生教育貫注精誠不樂仕進不慕利榮歷年六十持
以堅貞挽回造化期在傳薪任重遠道弦毅免并醜縷不盡至言純行仁孝天
性大本所基基既牢固萬善咸依一塵不滓百折不移聰明天縱謀人先施儼
然溫厲汲汲孜孜辨別利義收拾散遺救民衛道興學不疲凡諸美德悉出孝
思我未親炙贊文奉師不能敷釋西河見疑昨承赴書告亡兄友從兄子權盟友潘秋
經皆受業師門故
告之梁木其壞九原聚首兄友如知應亦號慟梟獍人羣虎狼兵衆誰折機牙
誰播絃誦八衰將屆實古所稀惟師道貌允合期頤所不期頤憂勞成疾我知
師年喜懼兼溢常肅來候輒請安謚曰一息存稍懈不得作述猶然有始有卒
我祇庭訓罔所追隨稽首西向經師人師初無攀附恰受恩施紅羊浩劫舉家
流離若敖之鬼幾致餒而蒙師援救惠我多金廣爲延譽俾鶴得林巢覆卵完

馳書慰唁去臘將終猶承郵傳上問爲生下言委頓感師慈仁虔祝健康詳觀
筆畫神彩無倦謂當無妨行且加膳豈意長辭緣慳一面文子文孫善言先德
同門諸君好爲紹述無能光顯在列門牆謹守師說不敢乖張邊陲薄奠尙祈
來嘗

惟中華民國二十五年二月二十日宜祭之吉受業劉錫謹以香帛酒醴庶品
不腆之儀敢昭告於我師

子休徐公之靈前而祭以文曰浩然正氣宇宙長存下爲河嶽上爲日星惟我
孔子道冠古今志在春秋行在孝經惟我孟子私淑孔門以息邪說以正人心
惟我朱子諸儒大成繼往開來絕學復明嗚呼我師天生哲人至言純行新安
比倫貧賤不移富貴不淫威武不屈卓爾不羣回憶戊申始到師門我本幼孤
師而成一日召訓我與游君當時詰訓留學東京寄回像片示我兩人師則莞

賴爾笑言指陳此羽豐弟此子九兄斯言如昨忽廿九春在昔辛未植師七旬未克稱觴有愧傳薪癸酉之歲重見益親手書粹語教以躬行方冀老成長爲典型誰料丙子遽赴修文爲天下慟又哭私情嗚呼我師宜享廟庭浩然正氣宇宙長存尙饗

維中華民國二十五年歲次丙子正月朔二十有八日展奠之辰 受業李德龍
謹具清醴庶羞之儀致奠於吾師

壽園夫子之靈而泣曰嗚呼道喪千載學絕義乖生心害政爲厲之階蜀處邊隅屢更大亂師儒不作文獻中斷考據詞章重以老佛無實無用支離恍惚惟我夫子抗心希古淵源洛閩上溯鄒魯薛胡張陸晚村寧人取則不遠洞見道真刊落俗學息邪拒諛窮理居敬作聖之基義利公私反覆辨晰色莊言厲示我學的憂時憫世垂意英賢誨人不倦五十餘年尊孔讀經守先待後有德有

言是日不朽絜予小子蠢愚冥煩丙辰之歲始附 師門惟時 夫子 道躬
猶康時操几杖侍從游翔舞雩春風登山臨水即物寓教無非至理設閱書會
建六賢祠七厯寒暑而命耳提惠之詩篇懇懇厚意媿我庸劣弗克繼志自時
厥後朝誨夕勗重以昏媾視我彌篤方謂吾 師期頤可望親見弱女盤殮進
養天不憖遺哲人遽萎爲天下慟又哭其私新春獻歲問病榻前言猶在耳負
隔人天遺命綦重懼弗克承欲辭不敢欲任不能嗚呼君子道消世難方棘負
也實多慟也曷極戮力盡瘁誓本厥初吾 師之靈庶其 鑒諸哀哉尙 饗

大成會請金

徐子休先生哀辭

愚弟盧湘父拭淚拜輓

天地否塞聖道晦盲哀哉吾黨壞此長城憶在庚午實始識荆蒼雁頰鯉時傳
款誠霽園隨筆叢錄大成言論行事追維生平我著蒙書君爲品衡匡予寡闇
寔所心傾維時手簡縷言病情未虞噩耗旦夕遽驚孔君厚菴聖裔之英陳君
重遠朝陽鳳鳴癸酉兩逝嗟予喪朋晨星落落又悼先生一老不遺天心曷明
西瞻蜀士大道共弘哲嗣繼述更貽令名絮酒隻鷄道遠莫呈我心碎裂我淚
縱橫

大正十年



...

...

...

輓詩

子休道兄先生靈鑒

愚弟劉咸榮拜輓

人生七十古來稀七旬又五願無違

君自言開年卽七十五果如其言

自有精神長不沒知君魂從

天外飛魂飛飛向何處去杏壇花暖待君歸

君亡於春初

鑽仰高堅夕與朝尼山咫尺

在堂竭力排衆論尊孔子日月懸象天爲昭湖湘故人書往復

趙芷蓀提學極尊孔子與先生書札往來

洞庭萬里神遊遨平生醉心朱子學考亭春滿飲醇醪有時正言罵奸佞白髭

音滋叶平聲

怒橫霜氣高有時無奈時局苦頻搔短髮風蕭蕭有時忽喜故人至竹風

梅兩同清標最愛與予談試事至老猶多秀才氣希文憂樂我讓君斗室未忘

天下利死生去住亦尋常立言不朽千載計自古達人能安命盡厥天年得其

正一任狂風特地吹定知墓草猶能動氣暖春雲土一坏還君寂然不動之天

性子休夫子靈鑒

門人杜煥章頓首拜輓

程朱張魏後夫子獨巍然秦嶽立千仞江河吞百川孤懷綿泗水高節隘雲天
未信斯文喪遺薪火尙傳

英明天所縱敏悟冠當時一面畢生憶羣經無字遺先知三代後高論萬山卑
何處傷神甚春秋祀孔期

平生嚴義利千古起廉隅孤詣全球少清風四海無人心能挽救正氣賴匡扶
何事遭陽九翻然返太虛

持躬如三曲剛毅似伊川嶽嶽真夫子昂昂古大賢曉音千聖脈斯道一身肩
猶未知廉恥山頽蜀可憐

立學培年少深心在樹人吹來蓉校雨放出杏壇春全世仰山斗及門多鳳麟
鵝湖同此意興國在明倫

羣言淆亂日真理等兒嬉示鵠蜀中服驅鱷天下知鐵肩擔道義剛氣懾熊羆

此後金聲歇誰歟正論持

不信微言絕激昂獨振襟存仁千載事衛道一生心集會陶羣彥刊書擲萬金
準繩高可仰遺著是元音

聖功王道出孔孟有門庭治本日言孝與民常正經撐天孤柱轟福國萬年馨
政化由斯立楊園繼典型

不官惟愛國無產但憂民飛電常驚世抗言每逆鱗桂薑辛辣性松柏歲寒身
直道今誰繼蒼生哭此人

我本椎愚者侍師三十霜幸聞爲政說兼識作人方希聖誠兼敬臨民禮與莊
訓言猶在耳哀痛望宮牆

子休前輩先生千古

後學吳海梁哀輓

海水飛揚激此日拚將隻手力扶持酤來旨酒留賓醉記得高軒過我時落落

大成會彙錄

磊磊留好樣堂堂正正作人師華陽德範垂芳遠教澤千年口載碑

高山流水 三疊夢窗韻哭

霽園夫子

門人陳配德自滬倚聲哀輓

絳帷日日坐春風繞江鄉都是青葱孤枕萬重山窮邊望隔歸鴻淒然又化碧
啼紅還愁對千古秦關漢月冷映簾櫳撫零縑斷楮一一淚痕濃 寰中浮雲
變今古空付與半畝槐宮蕉夢已全非逐鹿那辦香茸倚擎天怕觸共工貞元
會誰省西窗點易送老龍鍾待何年兩鬢頭白惱人慵
老懷一一付東風滿華顛春氣葱葱三兩斷絃聲清微暗客遙鴻追游處蝻綠
梅紅心期在千結愁腸易折夜月明櫳種門牆萬樹列列布陰濃 陸中依然
有高隱渾不管漢苑唐宮冰雪後凋姿漫惜弱草蒙茸歲寒深想見天工嚴城
重時聽霜雪警柝淚盡千鍾待歸來也山郭比人慵

亂叢葉葉戰秋風捲清商摧徧青葱三載故園心音書夢託飛鴻衰顏對病榻
燈紅天涯路回首驕遲倦客淚落房櫳倚梅花萬樹蔽蔽正香濃 匣中心芒
有多少直射斗柄牛宮珍惜百年身野鹿善養芳茸後千秋點畫難工傳衣事
應付乾坤歷劫氣盡誰鍾溯淵源有自心力已交慵

輓聯摘錄

案治喪處登記共收輓聯其數逾千本號限於篇幅未及備載茲陸續刊布
編者識

正氣炳日星施教五十餘年尊孔讀經百世不惑
親交泣風雨贈我二三同志山頽木壞吾黨安之

愚小兄曾

鑑

率子

子

範孫

朝

華熙基

曾孫

天錫頓首拜輓

華陽興學禮三賢惟公久作名師時復抱琴彈古調
成都逸民推五老從此不聞直論更誰炙輶發長言

愚弟方

旭率孫鳴鑿頓首拜輓

相親垂五十年善勸過規交情始末能容我

受學有三千士火傳薪盡道統承當定得人

愚弟尹昌治頓首拜輓

九重天上歲華新知君恨濁世難留怒擲人間竹杖
五十年中來往慣歎此日良朋安在空餘窗外梅花(一)

堅持心力過吾儕憶平時直言正言有味乎其言薑桂性愈老愈辣
獨至精神尊孔子看此日書在志在斯人若猶在山嶽氣不崩不騫(二)

愚弟劉咸榮率子受業恆階拜輓

交游重劉衷聖胡貞菴志合道同德業正需賢者續
學問追黃梨洲李二曲清風勁節高標留待史官書

愚弟李固基率子文激頓首拜輓

昔年共事舉比霽月光風使我自然消鄙吝

今日誰談道學泰山梁木令人益復惜摧頽

愚弟趙椿煦 率子 鴻頓首哀輓

論定是非不畏強權增衆望

道承忠恕因知名教重大成

華陽同學弟張清源拜輓

是鄉邦先正典型烽火迫衰年讜言隱戢羣雄氣
爲聖道干城捍衛皋比敷德教遺著應成蜀學篇

龔維鈞拜輓

滄海正橫流從此有誰作砥柱

風義兼師友不敢同君哭寢門

龔道耕 率子 與 立權 拜輓

千古見道心神志湛然死無變於己
一掬憂國淚典型賢墜人尙胡由行

余 舒頓首哀輓

以衛道自任以人師自居洙泗同風每念儒宗追定祖
不爲富貴淫不爲威武屈干戈累歲獨悲高節竇譙玄

林思進頓首拜輓

篤信孔孟風節自標耆舊數川西誰如此老
遠隔山河絮酒莫致來遊過城北再弔先生

張 瀾拜輓

蜀中耆宿咸欽魯殿靈光惡耗忽傳來庶士驚聞齊墮淚
世教陵夷獨繼尼山正統狂流嗟孰挽賢書同列倍酸心

年愚弟廖世英敬輓

道義重躬行平生庠校育才扶持正氣

治平關學術長留士林模楷懷想遺風

劉湘拜輓

教人讀有用書薪燼火傳學比濂溪非太極

期公以無量壽山頽木壞生如宣聖長三年

劉成勳頓首拜輓

共欽崇城北徐公聞喪匍匐弔之東亞郵傳悲此老

當列入華陽國志歎息先生歸去西川道義寄何人

愚弟趙鵝山華子錫雋拜輓

尊孔千秋存正道

悼蜀羣彥失師資

劉存厚恭輓

片語定危疑南州冠冕高徐穉

雅言陳禮樂東魯薪傳紹文宣

曾擴情恭輓

不降志不辱身何堪五老座中又弱一个

能守先能待後即此四川門下已足千秋

楊森拜輓

弔古哭斯文譽鳳嗟時巍然隱去靈光殿

當今誰步武龍蛇厄運卓爾昭茲孔聖堂

後學田頌堯拜輓

敦崇道德著書挽既倒狂瀾是蘭陵所謂儒效
感慨山梁遺訓在大成叢錄如木鐸徇於路人

後學彭 芬恭輓

文字足千秋奚必十年宰相
衣冠同一哭豈惟八百孤寒

西康總省委員長
川康邊防總指揮 劉文輝恭輓

守程朱以講學甚似吾鄉羅忠節公時正艱危及門中當有如王李諸賢各秉
師傳能弭亂

後學雷 颺敬輓

道脈在詒謀

排佛老而著書大類唐代韓昌黎伯我來弔唁觀堂下了不見緇黃一輩益知

沒世已稱名衆望同尊垂老傳經思伏勝
立言皆有道師承未墜憂時教士仰王通

後學孫震拜輓

蓄道德能文章更重躬行實踐柴立不阿蜀學編中推第一
育英才闡聖緒期於用世坊月薪傳相續河汾門下逾三千

鄧漢祥拜輓

眞名孝廉善新教育不移不屈不淫侃侃而談救時大通中外事
尊孔孟書留國家范立言立功立德洋洋如在浩氣長充天地間

後學鍾毓靈頓首拜輓

平生闡教杏壇培植才賢仕隱皆爲名世出
往歲叨陪末座相看耆耄殷勤猶問誦書時

後學高 祺 率子 國壽恭輓

河汾弟子聚通人幸冢息摠衣忝列門牆爲後進
盤屋孤童接關學賴霽園承緒合開祠宇祀先生

陳國棟 率子 配德敬輓

門前盡列英才最難傳道有人多士執經稱弟子
天上若逢吾父爲說顯親無狀高文表墓出先生

余中英恭輓

予亦私淑諸人自當開國以來儘有高行驚末俗
天不憖遺一老歎息六經而後惟留絕學在名山

公安局長
警備司令 侯建國拜輓

扶翼聖功東海文章垂世範

挽回儒術西川風雨槍經師

唐式遵拜輓

立身持己希聖希賢言可法行可則遺著闡羣書既倒狂瀾資一注
興學育才淑人淑世仰無愧俯無作及門遍寰宇永敷教澤在千秋

陸軍第一百零四師師長
四川綏靖第一區司令李家鈺頓首拜輓

摧一時智勇開萬古心胸論文公比陳同甫

挽既倒狂瀾作中流砥柱衛道人思韓退之

後學黃世傑拜輓

文章學問直追司馬東坡治理見宣言在野不忘匡國是
詩酒餘年猶憶臥龍昭烈鳩工新廟貌即斯可以證襟懷

文重孚拜輓

異學慨朋興邪固害正似亦亂真方幸中流瞻砥柱
微言賴崇闡德既不孤文因未喪曷教吾道失干城

香港孔教學院院長朱汝珍等拜輓

魯仲連解紛排難救斯世之民秦強不敢稱尊高義共稱天下士
文中子講學授徒以傳道自任唐興克平大亂及門早樹濟世才

世愚姪趙

制

家

宏宸

頓首拜輓

歷數軍閥貪殘爲全川七千萬人吐氣
獨傳儒宗學術樹中華二十五載儀型

後學覃筱樓頓首拜輓

百戰老疆場愧我凡庸難辦賊

方方集卷之六
六
一朝驚風燭從茲矜式更何人

後學楊秀春頓首拜輓

治學源洙泗服官歷蓬瀛老成歎摧頽識字人同聲一哭
持躬謹清操作育宏正氣後輩盈寰宇蓋棺論定足千秋

蔣尙樸頓首哀輓

譽世膺民天下菁英沾化雨

山頽木壞滿門桃李失春風

教弟盛光偉 率子 餘豐拜輓

史紀儒林傳稱高逸理學衍五子淵源研經獨作中流柱
鄉人會弔徒從行喪儀型動千秋觀感操筆爭書有道碑

晚孫兆憲拜輓

出殯記

霽園先生既歿家屬遵速葬遺命卜於夏曆正月二十九日安厝成都東門外十里之曹家冲祖塋距先生之歿十有八日也前夕雨作達旦弗止送殯者千餘人不爲雨沮除先生知舊及霽園先後同學二百餘人外有華陽縣保安隊暨縣立中學職業學校省立女子職業學校私立大成中小學校學生共八百餘人質明遣奠發引方向神爲導銘旌亭次之黼黻雲翼功布次之像亭次之士兵學生則整列從其後門人分左右執紼紼長二十餘丈近柩乃家屬男女皆沐風雨涉泥濘景氣肅穆顏色之戚哭泣之哀非惟親族然也送殯賓客無不感愴歎悲動容色沿途設案致奠者凡二十二處曾與如劉豫波尹元理尹仲錫諸先生與先生交深且久曾劉長先生四歲二尹亦七旬左右人也俱不避塗潦徒步隨喪出東門至一洞橋經主家禮辭乃止蓋先

生之喪非特一家之慟及門之哀實蜀士之所共悼川民之所同悲而況誼篤故舊如諸先生者乎成都舊例巨室出喪必備鼓吹軍樂羅旗旛延僧道張布祭帳輓聯以爲觀美 先生嘗有薄葬及喪不用樂之遺命故一切屏去而道路觀者咸歎息泣下交口稱賢非 先生德崇望著深洽人心夫豈一時之感而致然耶喪至得勝鄉區立小學學生百餘人迎柩致禮折而北行跋淺邱泥塗沒趾杖而後能步喪主既辭兵隊學生隊而門人隨至墓地者尙百餘人由郭仲權君題主並祀土神禮也午後二時窆棺封土家族行禮訖門人羅拜墓前皆哭失聲比反則衣履盡泥漬矣葬後三十一日門人李德龍敬爲記

恭送徐剛介先生神主附祀六先生祠記

曾延年

孝毅成君

自昔仁義充塞之頃危行言遜之邦鄉愿得以肆其鼓簧正氣靡能摧其凶箠然而數窮斯變非興替無以見大化之功人謀勝天雖匹夫可以操運會之柄華陽徐霽園先生砥礪廉隅作育多士好剛以學赴義必先俗流憚孟博之清裁豈子詆紫陽爲道學河汾設教掘趨皆將相之才洙泗同源談笑無桓文之事豈非秉日星而降誕移風氣以自任者歟丙子正月考終霽園門人既畢會葬永懷琦表僉謂報之享祀庶幾式我枌榆嗚呼斯文將喪先萎哲人國步未寧遑恤縻緯昨日之日不復後死之死何堪於是吳國傑曾延年乃合辭函請於大成會之董事曰竊惟華陽徐霽園先生尊經衛道爲世表坊不幸天不憖遺溘然長逝溯高風其未遠仰教澤之遐敷淑世之師民德攸繫原少城六先生祠崇祀宋儒扶維名教巍巍盛典倡議始於霽園近年復由大成會建議敬

爲劉裴邨先生列位於祠殿之左籩豆有偶鄰德不孤今敢援例請列霽園先生之位於祠殿之右揆以沆瀣之義豈惟觀感所資矧報功即以善鄉尊賢尤在勵俗是一舉而備諸善宜急務而勿緩圖應請本會諸君子即於二月二十七日霽園先生誕辰奉位入祠循例致祭嗚呼道延於世莫非在人設祀於鄉所以爲禮謹陳芻議佇候鴻裁會董善其說即諏於二月二十七日擬公行入祠禮焉屆日春雨新晴物情歡悅霽園親知及門弟子於朝曦在望宿鳥始聲則已齊集大成會禮堂趨詣遺容如儀展拜所以紀念先生之誕辰情因新感而彌殷也小憩移時恭奉神位整列西行聯袂來相送者無慮數百人則見天空四清雲留一碧接鳥修途不聞音響蓋與與如也行經少城公園芰荷池畔南望桃花源賣酒家曉煙未歇芳樹初葩極目酒帘倚風如醉追憶三年以來月必侍先生樂壺觴於此者再去年今日先生爲避賓筵偕李子伯飛尋幽池

上縱談諧笑遺茲佳日余雖不得追隨然聞其事而神往久之曾歲月之幾何而面命不可復接矣因度伯飛適於今日觸省舊游惆悵如余必有同感而凡來相送之諸君憮然興歎懷抱雖殊其不能蠲念疇昔要可知也比至祠前正當日午徐氏家屬鵠立門外相將迎主升堂布席而祭其告文曰弟子周道剛等謹奉私誼剛介華陽徐子休先生之位附祀六先生祠而敬告之曰懿矣先生道足以立當時之極學足以爲後世之師其言論拓開萬古如霆摧電擊而無不入人肝脾其風槩壁立千仞如泰山喬嶽而有時氣和以夷其爲術精故稟學者不問窮達而皆得隨分之陶鑄其爲教嚴故從遊者雖甚跡弛而不敢自軼其藩籬此其歷劫而不磨之精神求諸並世而真能與之抗顏行者其誰假令克登大耋以扶世翼教則功利之及於物者寧可數計而周知奈何一病沉綿遂不能起慟吾黨小子之無祿而天莫之遺嗚呼先生世會所須遽與長

辭而不獲大施所詣純實而氣岸雄奇不處高明而聲章四馳是誠死有傳於後世生有聞於當時古所謂鄉先生歿而可祀於社者信其若茲當清社之始屋嗟末俗之已漓利欲肆其紛拏異言溷其喧騰原患氣所由積實學蒞而多歧先生於是表彰往哲以開後來謂如南軒鶴山華陽蜀公貫之天授六先生者粹然一出於正允足爲鄉里後進之師資爰乃鳩工建宇竭虔昭事用樹標矩而啓宏規旣又以裴邨先生學見大原名節無疵俎豆其間在禮不違道剛等追懷教澤悼失依歸以爲先生氣配道義當世所推易名之典於官有闕私諡之號於古有稽諡曰剛介載觀其宜蓋公是之所在孰得而議其阿私又以先生視張魏諸儒其生則晚生平行誼思與之齊洵沆瀣之一氣寧臭味之差池乃因先生誕世之辰奉木主以入祠穆乎其意肅乎其儀卮酒芬芬屋牆持持冀先生之神靈其安於斯重念道剛等杖履追隨其多歷年所者旣四十而

有奇濟濟英少同荷提撕念再三之夙義輒不禁涕泗而歎歎繼自今所欲交相勸勵以仰爲慰答者惟在內自揆撫嶠然其不欺言制行則無得借道以趨言治學則無得舍業以嬉庶幾免於大戾蚤夜以孜孜况以文山之成就卓卓其感發於四忠一節者編簡具垂則夫吾黨小子有資於享祀不忒抑又可知嗚呼魂神雖遠如在皋比警欬不聞精神有依冀先生之靈其歆鑒之禮成合食堂下論宋賢之軼事慕衷聖之風節日旰始退嗟乎鵠啼大暮馬鬣新封天道有恆禮宗不死爭刊遺著知無封禪之文周訪輿思喜得蓋棺之論誰謂古今人不相及也哉是日賓從視先生年齒相若而交契金石者莫若曾璠齋先生及尹約堪先生昆弟剛介之諡曾先生實始倡之交情見於生死旁觀勝於自知一字難移國門可榜若夫出言有則情文不賈跡紹歐蘇於北宋學異陳許之南蠻告辭則門人郭子仲權所撰云

大成會業錄

戴院長電告旅京同學設奠概況

藩庫街大成學校徐深甫學長並轉仲權兩農暨同學諸先生惠鑒斯文大厄遭 霽園夫子之喪傷痛何如京中川陝同學於昨日午前八時假新亞細亞學會致奠推年長同學主祭以下依序列禮成後於靈位前靜坐默誦孝經每卷誦畢仍由主祭者上香虔敬肅穆一如夫子授教之日嗟乎而今而後我輩惟有矢信矢忠立身行道以報師恩於萬一學會學校尤望諸公共同維護以垂久遠至諸兄所命容與此間同學熟籌再行報告聞安葬期已近賢不能奔歸執紼尤爲大憾並懇轉慰孝悌兄爲感弟戴傳賢叩篠

一
月
全
書
金

霽園先生圖書館籌備經過

霽園先生逝世後門人集議謀所以紀念 先生者於是有籌建圖書館之提議由首事者列名發出公啓徵集贊成人及發起人啓云

敬啓者竊維開來繼往所貴傳心探蹟鈞沈有資載籍吾

師霽園先生道宗鄒魯學紹洛閩以不厭不倦之精神爲有本有末之啓誨授徒殆六十載時雨無私造士逾數千人春風廣被方幸老而彌健志盛骨強何期天不憖遺山頽木壞樹森等服勤未竟悼心失圖悵此後之疇依嗟承流之無自重念昔賢起墓示摧痛之至心何如準古藏衣守琴書而勿替况吾師津逮後進痛戒虛車謂宜多讀有用之書然後有以爲承學之地用是舟車所至覓購忘勞囊篋雖空劊劊不輟凡所鐫置何啻千編舊所收儲半皆捐贈今雖精靈如在親炙末由誠能循此軌涂悉心經畫拓基立館依類駢陳更事搜求

俾臻美備由是而漸漸浸漑蔚起通材更進而光大發皇轉移世運庶使吾
師生平心事長揭日月以行亦令後起有志朋徒共識江河不廢同人不敏爰
擬就成都省城內藩庫街大成會地址籌建圖書館一所名曰霽園先生圖書
館以垂永久所冀

大雅宏達

同時輩流或斥囊金或出藏帙促成斯舉共此千秋嗚呼述德難終敢借在三
之義觀戈有待願恢累寸之功倘荷

贊同請書

台篆正籌議間適旅平同學謝次舟先生函至自願將所藏書籍悉數捐入館
中併此輔及統惟

垂察不宣

贊成人曾鑑尹昌齡劉德祿曾延年陳鳳書李嘉珍黃榕李猶龍曹忠亮姜大榮宋興開門人高樹森周道剛文澄劉德沛羅迺瓊蔡家驥劉澤霖徐白懷杜煥章章士林胡萬錕游煒劉憲章郭誠永趙衡徐璨徐孝剛劉乃鑄李德龍郭彥謙黃樹煊龔澤耕賀明元劉和瑄謝廷康葉書麟高礎趙鵬郭諧永孫振並擬就暫訂辦法八條

(一) 先後及門同情此舉者請列名爲發起人

(二) 各地官紳 師門知好同情此舉者請列名爲贊成人

(三) 贊成人及發起人均請負募集款項圖書之責每人領取捐冊一本至五本分頭勸募

(四) 暫就成都省城內藩庫街大成會成立籌備事務所并刊一章文曰籌備先生圖書館籌備事務所章

(五)募得之款項圖書不拘數目多寡均交由籌備事務所負責保存掣取正式收據爲證

(六)建築之圖樣設計及工費預算由籌備事務所推舉人員負責辦理

(七)關於籌備事項如有熱心贊助或建議者請向事務所商洽辦理

(八)關於進行事項由事務所隨時集衆商議公同酌定之

遂於三月一日開籌建 霽園先生圖書館事務所成立大會到會一百零二人公推周葦池君爲臨時主席通過簡章並推定各組辦事職員茲將簡章及各組職員姓名錄後

霽園先生圖書館籌備事務所簡章

一 本事務所設理事七人互推二人爲正副理事長負責綜理本所一切事

宜

二 公推名譽理事若干人贊畫本所一切事宜

三 本事務所辦事分下列五組

(甲) 總務組設幹事五人至七人互推二人爲常務幹事負責辦理關於一切設置及召集會議暨不屬於各組事項

(乙) 文書組設幹事五人至七人互推二人爲常務幹事負責辦理撰擬文件事宜

(丙) 會計組設幹事五人互推一人爲常務幹事辦理銀錢出納事項

(丁) 工程組設幹事五人互推二人爲常務幹事辦理建築工程事項

(戊) 保管組設幹事五人互推二人爲常務幹事辦理保管圖書事項

四 本所職員概屬義務惟司繕寫及常川駐宿之人得酌送薪資

五 本事務所附設於大成學校

六 本事務所每月開常會兩次遇有特別事故得召集臨時會議均由所先行通知

七 本所此後遇有重要事故不及召集開會時得由理事長主持辦理

八 本簡章經開會通過後即日實行

九 本簡章未盡事宜得商取多數同意增改之

職員表

理事 周萃池 徐深甫 羅伯常 廖學章 龍國楨 郭仲權 文藻青

總務組幹事 劉雨農 盛震生 洪次雲 蔡鸞階 馮一披 劉鼎鈞

胡萬銀

文書組幹事 郭仲權 杜雲翹 徐耀庚 劉潤安 陶亮生 葉叔明

李伯飛

會計組幹事 高博齋 丁轟超 黃美涵 郭季容 江瑞五
工程組幹事 李伯驩 王叔培 劉剛甫 沈鄂生 蔡昂若
保管組幹事 龔雪農 孫恭權 高履安 趙君舉 游叔煌
又附議私諡 徐先生爲 剛介先生經衆贊成
復於三月七日開全體職員會推出理事長及各組常務幹事如左

理事長 周萃池 徐深甫

文書組常務幹事 郭仲權 李伯飛

會計組常務幹事 高博齋 丁轟超

工程組常務幹事 李伯驩 蔡昂若

保管組常務幹事 龔雪農 孫恭權

周萃池君提議每月開職員常會二次定間週星六日午後六鐘遇有特別事

故得召集臨時會議又提議函各方募捐經衆贊成

旋由文書組發出募捐函原文如下

竊維豫章白社亭著思賢高密濰鄉坊崇通德仰徽猷而永芳躅由來尙已
顧名賢逝矣自有不朽者存而邦之人必緣情制物因跡象以求精神者非
徒慨慕流風蓋爲勵世而摩鈍也 霽園徐子休先生德行美備學術深醇
覺世爲懷誨人不倦其剛如壁立千仞其介則不易三公其爲教也本末兼
賅文行交重當清末士習頹敝則獨先興學立教旁採西鄰文化以補格致
之亡洎近代學風囂凌則倡導尊孔讀經致力東魯遺書以窮本原之詣迄
於比歲邪說橫行人心陷溺 先生尤怒焉憂傷以斯道自任每念及斯民
疾苦國紀陵遲知無不言言無不切饑溺由已險難不辭後鄭方嚴仲穎自
尼樽酒之獻君黃勁特光武卒爲詔策之褒民隱得以稍通正誼因而不失

何圖世方嚮治天不憖遺如泛舟駭浪而失舵師如驅車危坂而亡御者豈
惟門生故舊之私慟抑亦邦人君子所同悲人之云亡邦國殄瘁顧瞻前路
愴怛何窮道剛等睠念典型追維教澤爰師古昔表章賢達之義兼采歐美
紀念名碩之規謹擬於先生手創之大成學校內築室數楹庋藏先生
平生著述並集貯新舊圖籍名之曰霽園先生圖書館其辦法概略已如另
啓所述意謂有此基構庶幾先生人往而神存亦使後進承緒而食德正
不徒眩示多文苟爲觀美而已嗟乎文翁勸學石室之畫像以名子雲著書
洗墨之芳池猶在况於先生講學明道度越前哲身之存歿繫國重輕何
可不永其傳以宏沾被則斯館之築可緩乎惟是將有事於建置必先有藉
於資財茲已就大成學校設立籌備事務所開始募集素諳滿懷風義必
荷扶持敢乞 欵金促成斯舉義惟在於哀集數不泥乎取盈捐冊附呈伏

維照察祇頌 台綏不具 又函請曾煥如諸先生六十餘人在名譽理事
原函如左

敬啓者竊道剛等稟學 霽園深蒙啓誨追念淵源所自冀廣津逮之思爰
由同人發起籌建 霽園先生圖書館就大成學校內成立籌備事務所擬
具簡章於三月一日開會通過隨即推定理事及各組幹事伏諸 先生望
實交崇萬流宗仰謹由同人公推爲名譽理事期荷 挈持諒在 盛心必
蒙 高贊除捐冊另函塵奉外特檢同簡章專函布達敬祈 督照並乞
不吝導掖爲幸此致

先生

籌建霽園先生圖書館理事長

周道剛 徐孝剛等謹啓

附簡章一份

大成學校紀念 徐先生之辦法

大成學校創辦人 徐子休先生逝世後由全體教職員於本年春季開學日
共同決議紀念 徐先生辦法如左

- 一 永定 徐先生誕辰（二月二十七日）爲本校創辦紀念日每屆是日應
舉行紀念典禮並講演 徐先生言行禮畢休假一日
- 二 籌備叢書出版後永定爲本校學生必備之書

方
通
有
讀
金

國府褒揚令 轉載華西日報

中央社南京一日電國民政府一日命令耆儒徐炯潛心經史志行純篤曩在成都講學對於民族大義頗多闡述近來創辦學校振導士風翼世匡俗功效昭著茲聞溘逝惋悼良深允宜特予褒揚以示政府尊崇耆碩之至意此令

本綠業經付印始閱報載 國府褒揚 先生之令爰增載於後目錄已先印就故未登入編者附識

月令

卷一

正月

二月

三月

四月